

PIDAGING

MAKA BANTANG AWIG-AWIG DESA ADAT MENGWI

PIDAGING	i
MURDHA CITA	ii
PRATHAMAS SARGAH	ARAN LAN WAWIDANGAN DESA ADAT MENGWI..1
DWITIYAS SARGAH	PATITIS LAN PAMIKUKUH.....2
TRITIYAS SARGAH	SUKERTA TATA PAKRAMAN 4
	Palet 1 Indik Krama 4
	Palet 2 Indik Parajuru Desa Lan Mancagra..... 8
	Palet 3 Indik Kulkul18
	Palet 4 Indik Paruman20
	Palet 5 Indik Druwen Desa.....23
	Palet 6 Indik Sukerta Pamitegep27
	Kaping 1. Karang, Tegal lan Carik..... 27
	Kaping 2. Pepayonan.....28
	Kaping 3. Wewangunan29
	Kaping 4. Wewalungan30
	Kaping 5. Bhaya.....30
	Kaping 6. Penyanggeran Desa Muwah Banjar...33
CATURTHAS SARGAH	SUKERTA TATA AGAMA.....34
	Palet 1 Indik Dewa Yadnya.....34

	Palet 2 Indik Resi Yadnya.....	38
	Palet 3 Indik Pitera Yadnya.....	38
	Palet 4 Indik Manusa Yadnya.....	41
	Palet 5 Indik Bhuta Yadnya.....	42
PANCAMAS SARGAH	SUKERTA TATA PAWONGAN.....	44
	Palet 1 Indik Pawiwahan	44
	Palet 2 Indik Wusan Merabian	47
	Palet 3 Indik Sentana.....	49
	Palet 4 Indik Warisan.....	51
SASTHAS SARGAH	WICARA LAN PAMIDANDA.....	53
	Palet 1 Indik Wicara.....	53
	Palet 2 Indik Pamidanda	54
SAPTAMAS SARGAH	NGUWAH-NGUWUH AWIG-AWIG.....	56
ASTAMAS SARGAH	PEMUPUT.....	57

MURDHA - CITTA

Om Swastyastu,

Om Awighnamastu nama siddham,

Malarapan saking panghyaning, Ida Sang Hyang Widhi Wasa asung kerta nugraha ngawentenang kahuripan sekala niskala, ring Bhuwana Agung lan Bhuwana Alit. Manut dresta Desane wantah pawakan pasayuban Krama Desa rawuhing kuta warga pawongannya. Desane keanggehang Bhuwana Agung, pawongannya soang-soang pinaka Bhuwana Alit.

Sotaning Bhuwana Agung. Desane wantah pawakan Bhawana mahurip jangkep saha Tri Hita Karananya luwire :

- a. Parhyangan. Sahananing kahyangan, penyiwian desa genah ngarcana Ida Hyang Parama Wisesa maka jiwaan desane;
- na. Pawongan. Krama saha warga desa maka sami mapawakan Bayu Pramana, mawinan desane sida molah maprawerti;
- ca. Palemahan. Tanah kakuwuban desa sinanggeh stulaning desane.

Adung patemon kang Bhuwana ruwa, ngawetuang kahuripan sekala niskala, melarapan Canta –Jagadhita sinanggeh murdhaning prayojana saha putusing Pesaban Krama Desa Adat Mengwi, gumawe Awig-awig Pakraman maka sepat siku-siku pematut. wastu presida, prayojanan mami kabeh prasama angidep muwah amagehaken kadi linging awig-awig inucap.

PRATHAMAS SARGAH
ARAN LAN WAWIDANGAN DESA ADAT MENGWI.

Pawos 1

(1). Desa Adat puniki mawasta : Desa Adat Mengwi.

Desa : Mengwi.

Kecamatan : Mengwi.

Kabupaten : Badung.

Propinsi : Bali.

(2). Jebar kakuwub wawidangannya mawates nyatur :

a. Wates sisi wetan : Desa Adat Gulingan.

na. Wates sisi kidul : Desa Adat Mengwitani.

ca. Wates sisi kulon : Telabah carik padang, Tukad Yeh Sungai, miwah Desa Adat Suralaga, Desa Adat Belayu (Kabupeten Tabanan).

ra. Wates sisi lor : Desa Adat Denkayu.

(3). Desa Adat puniki kawangun utawi kasanggria antuk 703 karang ayahan desa, tur kaepah dados 13 (telulas) banjar :

ha. Ring Banjar Delod Bale Agung : 86 pawon

na. Ring Banjar Pengiasan : 55 pawon

ca. Ring Banjar Lebah Pangkung : 68 pawon

ra. Ring Banjar Alangkajeng : 41 pawon

ka. Ring Banjar Peregae : 51 pawon

da. Ring Banjar Serangan : 50 pawon

ta. Ring Banjar Pande : 92 pawon

sa. Ring Banjar Gambang : 57 pawon

wa.	Ring Banjar Batu	:	56 pawon
la.	Ring Banjar Munggu	:	80 pawon
ma.	Ring Banjar Bajra	:	22 pawon
ga.	Ring Banjar Ganter Tapesan	:	25 pawon
ba.	Ring Banjar Pandean	:	20 pawon

DWITIYAS SARGAH
PATITIS LAN PAMIKUKUH

Pawos 2

Desa Adat Mengwi ngamanggehang pamikukuh minakadi :

- (1). Pancasila;
- (2). Undang-Undang Dasar 1945;
- (3). Tri Hita Karana (manut sada cara Agama Hindu);
- (4). Salunglung Saubayantaka.
- (5). Pikukuh rajeg ring Agama Hindu

Pawos 3

Luwir Patitis Desa Adat Mengwi :

- ha. Mikukuhin miwah ngrajegang Budaya, Adat Istiadat lan Agama Hindu.
- na. Nginggilin tata prawerti meagama, ngrajegang pangerastiti ring skala kalawan niskala majalaran antuk Panca Yadnyane.
- ca. Ngelaksanayang pararem-pararem desa lan tetiwak saking guru Wisesa.
- ra. Ngerajegang kasukertan desa saha krama pawongannya lan panegara, mejalaran antuk “ Sagilik Saguluk Salunglung Saubayantaka “.
- ka. Ngutsahayang Krama pawongannya mangda prasida ngelaksanayang Dharma Agama, Dharma Susila lan Dharmaning Negara.

TRITIYAS SARGAH
SUKERTA TATA PAKRAMAN

Palet 1

Indik Krama

Pawos 4

- (1). Sane sinanggeh Krama desa, inggih punika sang sane meagama Hindu sane sampun prasida ngenahin karang ayahan Desa Adat Mengwi.
- (2). Yadyastu sane nenten ngenahin karang ayahan desa, yan sampun satinut ring urah-arih tur swadarmane ring Desa Adat Mengwi.
- (3). Sewos ring sane munggah ring ajeng, angka (1),(2) kasinanggeh krama tamiyu.
(ha).Tamiyu inggih punika wang dura desa sane jenek medunungan langkungan ring asasih.
(na).Urah-urih wong dados tamiyu, sadurung warga tamiyu ngawentenang sahananing upacara patut masadok ring Prajuru banjar

(ca).Yan wenten jadma ngajak anak liyan saking Desa Mengwi, masuwe langkungan ring 3 dina, patut katureksa kawentenaniya antuk prajuru banjar

Pawos 5

Nganinin indik ayah-ayahan, Krama Desa Adat Mengwi wenten 4 (petang) soroh :

- (1). Krama Pengarep. Warga desa sane sampun ngenahin karang ayahan desa;
- (2). Krama Pengele. Warga saking krama pengarep sane sampun angalap rabi kasinanggeh magenah ring karang ayahan krama pengarep, utawi sane magenah ring dura desa.

- (3). Krama Teruna. Warga muwah anak putunya saking krama pengarep, sane sampun nemu kaniya miwah jejaka, sane kari sinanggeh ring krama pengarep.
- (4). Sewosan ring sane munggah ring ajeng, kasinanggeh krama tamiyu.

Pawos 6

Ngawit dados Krama Desa :

- (1). Ngawit saking ngenahin utawi ngalinggihin karang ayahan desa.
- (2). Ngawit saking pinunas ngeraga sangkaning sampun maderbe karang paumahan.

Pawos 7

Panumaya tedun makrama Desa :

- (1). Ngawitin sasih kasanga, tur majalaran upasaksi ke Widhi, minakadi ring Pura Kahyangan Tiga.
- (2). Sasampune polih pamutus saking Banjar genahnyane jenek.
- (3). Sasampune taler polih pamutus Desa.

Pawos 8

Ayah-ayahan lan papeson :

- (1). Krama pengarep kari jangkep alaki rabi (sane wenten lanangwadoniya sane kasinanggeh sampun kepatut pada tedun ngayah), ayah-ayahan lan papesoniya tegap.
- (2). Krama pengarep, balu ngempu silih asih (wenten lanang wadoniya) kadi munggah ring ajeng angka (1), ayah-ayahan lan papesoniya tegap.

- (3). Krama pengarep, balu ngempu: kawentenannyane lanang pada lanang wiyadin wadon sama wadon, ayah-ayahan manut kawentenan pawonganiya miwah peson-peson jangkep.
- (4). Krama ngarep ngelintik, ayah-ayahan manut kawentenan pawonganiya, miwah peson-peson aparo.
- (5). Krama Pengarep balu ngelintik sane medruwe pianak sampun merabian utawi mayusa 21 warsa ayah-ayahanipun kagentosin antuk anakniya, peson-peson tegap.
- (6). Krama pengele lan Teruna Teruni, ayah-ayahan miwah papesoniya manut kabuatan.

Pawos 9

- (1). Krama Desa kadadosang mapuwangkid :
 - ha. Rikala mamakuh wiyadin ngerebin wewangunan suci.
 - na. Rikala Meyadnya, minakadi risedek ngawentenang yadnya.
 - ca. Matepetin sakit / anak sungkan, miwah kanjekan ketiben sakit.
 - ra. Ritatkala / kanjek keluwasan.
 - ka. Kanjek kacuntakan (nganinin karya suci).
- (2). Krama Desa kadadosang numbas ayah-ayahan manut kabuatan tur kasungkemin antuk perarem banjar

Pawos 10

- (1). Wusan Makrama Desa :
 - ha. Saking pinunas ngeraga.
 - na. Saking nemu pati.
 - ca. Sangkaning matinggal ke dura desa, nenten mewali malih
 - ra. Gumanti wantah kanoroyang saking desa, majalaran wenten kaiwangan ring desa.
 - ka. Wusan maagama Hindu

(2). Sang sane wusan makrama :

ha. Patut ngawaliang karang ayahan ke- desa.

na. Tan polih epah-epahan sangkaning paderben desa.

ca. Yan mungguwing sang sane sangkaning pinunas ngeraga matinggal ke dura desa, yen prade mawali malih tedun makrama desa, kepatut nunasang riya ring desa.

ra. Yen sangkaning kanoroyang, kapatut muputang riya kaiwangannyane ring desa, sasampun puput yen prade malih mawali makrama desa, mangda mapinunas (nunasang) ring desa.

Palet 2

Indik Prajuru Desa, Mancagra Lan Pecalang

Pawos 11

Indik Prajuru Desa

- (1). Ring Desa Adat Mengwi kaadegang **Kelihan Desa Adat**, pinaka pamucuk lan pangenter ring Desa Adat Mengwi, sane kasangga antuk **Prajuru Desa** inggih punika :
 - ha. Patajuh (Wakil Kelihan Desa Adat).
 - na. Panyarikan / Juru carik (Sekretaris).
 - ca. Patengen (Bendahara / sane ngamong harta brana padruwen Desa Adat Mengwi).
 - ra. Kasangga antuk para Kelihan Banjar, minakadi Keangge pangeliman.
 - ka. Kawentenannyane ring ajeng manut kabuatan.
- (2). Ring suwang-suwang Banjar sajebag Desa Adat Mengwi, kaadegang Kelihan Adat utawi Kelihan Banjar, pinaka pangenter ring sajeroning ngamargiang tata-titi utawi urah- arih sane sampun kasurat ring Awig-awig Desa Adat Mengwi lan ring bebanjaran suwang-suwang.
- (3). Kelihan Desa Adat miwah Kelihan Banjar patut mawiwit saking Krama Pengarep utawi saking warga krama pengarep, malarapan antuk:
 - ha. Papilihan saking Krama Pengarep.
 - na. Keadegang suwang-suwangnyane selami 5 (lima) warsa, sejabaning wenten pariindikan sewos.
 - ca. Kapungkuran ring sampun puput 5 (limang) warsa, kapatutan kawentenang pagentos majalaran antuk papilihan ring paruman Desa Adat Mengwi.
 - ra. Sang sane kagentosin, yan gumanti tan wenten kaiwangan kengin kapilih malih.
 - ka. Ring sampune jagi puput ngadegang Prajuru Desa, patut maduluran antuk nunas upasaksi ring Pura Kahyangan Tiga.
- (4). Kelihan Desa patut :

- ha. Krama pengarep utawi krama pengele
- na. Nenten naenan ngardi wicara utawi melaksana sane patut katibakang pamidanda (kabui) selaminnyane utawi langkungan ring 5 warsa
- ca. Mayusa sakirangnyane 25 warsa
- ra. Pascad ngewacen lan nyurat sastra latin
- ka. Waras utawi kenak kapikayun prasida ngalaksanayang swadharmining prajuru

(5). Indik pencalonan Kelihan Desa :

- ha. Calon Kelihan Desa kajudi olih krama banjarnyane suwang-suwang
- na. Yan tan wenten papilihan ring banjar inucap kangkat nyudi calon saking tios banjar ring Desa Adat Mengwi

(6) Pamargin papilihan Kelihan Desa :

- ha. Risesampune wenten Calon Kelihan Desa patut kapratiaksayang antuk mancagra
- na. Papilihan Kelihan Desa kalaksanayang ring sajeroning paruman Desa majalaran antuk :
 - a. Kapilih sangkaning paras-paros
 - b. Kapilih antuk ngawentenang pasuara (Pemungutan suara)

Pawos 12

Indik Wewenang Lan Swadharmaning Prajuru Desa

(1). Wewenang Prajuru Desa :

KELIHAN DESA ADAT :

- ha. Wenang nitahang Krame Desa Adate, yan wenten kapisaratane ring Desa muwah wenang nitahang Prajuru Desa sane sewosan.
- na. Wenang nyeretahang tekaning rumaksa sahanan padruwen Desane.

- ca. Wenang mawosang miwah niwakang pamutus arep ring sahanan wicara sane kaarepan antuk krame Desane, kasarengin antuk Mancagra miwah Prajuru Desane manut Awig-awig Desa Adat Mengwi.
- ra. Wenang madeg duta miwah wali Desa, matemuang bebawos majeng ring sapa sira ugi.
- ka. Wenang ngamedalang pamutus madasar antuk kawicaksanan tur madasar antuk perarem sane sampun kacumpuang olih Mancagra, Kelihan-Kelihan Banjar miwah Prajuru Desa sane sewosan.
- da. Wenang nuntun lan ngenterang Krame Desa ngupadi manut petitis.
- ta. Kasarengin olih Mancagra lan Prajuru Desa wenang ngaryanin pangerencana-pangerencana (kriya nagata) sakeluwiring sane kabuatang ring sajeroning wewangunan sane kapisaratang.

PATAJUH, PANYARIKAN, PATENGEN, PANGELIMAN :

- ha. Wenang ngewakilin Kelihan Desane, manut ring pituduh miwah manut ring kawigunannyane.
- na. Wenang sareng midabdabang kawentenane ring Desa Adat Mengwi, manut sekadi sane mengguh ring Awig-awig.

(2). SWADHARMANING PRAJURU DESA :

KELIHAN DESA ADAT :

- ha. Swadharmaning Kelihan Desa Adat, kepatut pikukuh ngambelang miwah niwakang bebawos ring Desa, mangde anut ring kawentenan, anut ring Awig-awig, anut ring Pararem, miwah anut ring Dresta tur mangda madasar antuk paetangan Tri Pramana.
- na. Mangda tiaga ngalaksanayang pangelokika miwah mangda piteleb kemawasane ring Desa, mangda sida nemu karahajengan miwah kaselunglungan patunggalane ring sajeroning Desa.
- ca. Maweh tuntunan ring para Krama Desane, miwah maweh tatuladan sakebuatan.
- ra. Mangda pitetes, piteleb, tiaga ngambelang wiadin nitenin sahananing druwe- druwe Desane.

- ka. Mangda ngawentenang usaha, sane prasida jagi ngawentenang panyangga kauripan Krama Desane, kateka tekeng warganiya muwah panyangga kaweruhan.
- da. Mangda tiyaksa ring kawentenan Desane, minakadi majeng ring sang sane ngeranjing miwah medal saking Desa, mangda nenten jantos ngardi wiyadi miwah biyuta ring Desa.
- ta. Mangda maweh sasuluh ring para Kramane , mangda sami prasida mikukuhin miwah ngagemin Agama, Budaya lan Adat Istiadate.

PETAJUH, PENYARIKAN, PETENGEN, PENGELIMAN

- ha. Mangda satinut masarengan ring Kelihan Desa Adat, ring sajeroning midabdabang utawi ngarencanayang miwah ngalanturang saluwir pawangunanne, miwah nyarengin ngardi kasukertan lan karahajengan ring Desa.
- na. Mangda nyarengin Kelihan Desa ring sajeroning mitetes, piteleb ring padruwen Desane, miwah sane sewosan manut kawigunannyane.

PANYARIKAN UTAWI JURU CARIK :

- ha. Mangda siaga ngardinin kajangkepan eka-likita ring Desa manut uger-uger, miwah katekaning rumaksa kawentenane.
- na. Mangda satinut nyarengin nyanggra sakeluwiring karya, miwah nyarengin ngardi kasukertan lan karahajengan ring Desa.
- ca. Mangda tiaga ngarencanayang paruman, miwah nyurat pararem sane kasungkemin ring sajeroning kawentenan paruman Desa.

PATENGEN UTAWI JURU RAKSA DRUWEN DESA :

- ha. Mangda tiaga ngeraksa Padruwen Desa (harta brana druwen Desa). Lan ngawentenang atur piuning ring paruman Desa.
- na. Mangda setinut nyarengin nyanggra sakeluwiring karya, miwah nyarengin ngardi kasukertan lan karahajengan ring Desa.

Pawos 13

Indik Petiyas Utawi Olih-Olihan Prajuru Desa :

Prajuru Desa ngamolihin :

- (1) Olih-olihan prajuru Desa 10% saking pendapatan asli Desa,
- (2) Olih-olihan punika kapah antuk Kelihan Desa kapaica ring : prajuru Desa, Kelihan Adat, Mancagra, Pemangku, lan Tukang Banten(srati) manut perarem.
- (3) Pendapatan Asli Desa inggih punika :
 - a. saking olih-olihan pasar
 - b. pah-pahan saking LPD
 - c. dedandan
 - d. penyewa/penukun setra,
 - e. Olih-olihan sewosan ring wantuan pemerintah

Pawos 14.

Indik Ngentosin Kelihan Desa Adat/Prajuru Desa :

Kelihan Desa Adat/Prajuru Desa Kagentosin :

- (1) Wit sangkaning nemu pati.
- (2) Wit sangkaning magentos ninggal Desa.
- (3) Wit sangkaning pinunas ngeraga, majalaran kehanan pinungkan, miwah wit sangkaning sampun puput galah madege dados prajuru.
- (4) Wit sangkaning kanorayang antuk Desa.
- (5) Ngentosin Kelihan Desa utawi Prajuru Desa, patut ring sajeroning paruman tur mangda kehingkipun antuk Krama Desa.

Pawos 15

Indik Mancagra

- (1). Ring Desa Adat Mengwi kaadegang **Mancagra**, sane kaenter antuk **Kelihan Mancagra** miwah kasangga antuk :
 - ha. Patajuh utawi Wakil.
 - na. Panyarikan utawi juru carik.(Sekretaris).
 - ca. Patengen utawi juru raksa (Bendahara).
 - ra. Angga (Anggota) Mancagra.
 - ka. Kelihan Mancagra kaadegang ring paruman Mancagra.
 - da. Kawentenannyane ring ajeng manut kabuatan
- (2). Mancagra Desa Adat Mengwi, mawiwit saking Krama pengarep utawi saking warga Krama Pengarep, sane kajudi olih Krame Banjarnyane lan pinaka duta suwang-suwang Banjar ring sejabag Desa Adat Mengwi sane akehnyane manut sekadi perarem lan kawigunannyane.
- (3). Mancagra Desa Adat Mengwi, kaadegang suwang-suwang melami 5 (limang) warsa, sajeroning wenten pariindik sewos.
- (4). Kapungkur ring sampun puput 5 (limang) warsa, patut kawentenang pangentos utawi pikukuh saking suwang-suwang Banjar, saha maduluran upasaksi ring Pura Kahyangan Tiga.
- (5) Sang sane kajudi antuk banjar suwang-suwang dados Mancagra patut :
 - ha. Mayusa sekirang-kirangnyane 25 tahun
 - na. Waras utawi kenak kapikayun prasida ngalaksanayang swadharmining Mancagra
 - ca. Uning ngewacen lan nyurat sastra latin

Pawos 16

Indik Wewenang Lan Swadharmaning Mancagra

(1). WEWENANG MANCAGRA.

- ha. Wenang pinake Panureksa sane mretiaksayang lan ngindikang pemargin parikraman Prajuru Desa ring sejeroning ngemargiang pangerencana manut sekadi kawenangan lan swadarmannyane.
- na. Wenang ngaturang tetimbang utawi tuntunan ring Perejuru Desa sakeluwiring pariindikan sane ngulati kabuatan ngardi kasukertan, kaparahitaning Krama Desa Adat Mengwi sane patut kemargiang olih Prajuru Desa.
- ca. Wenang ngerawuhin peparuman Desa Adat Mengwi, ngemedalang bebawos lan ngaturang pasuara.
- ra. Wenang mialangin diparade wenten pemargin Prajuru Desa nenten manut ring perarem lan awig-awig Desa Adat Mengwi.
- ka. Wenang ngelaksanayang pemilihan Kelihan Desa Adat Mengwi, manut sane kasurat ring Palet 2, pawos 11, angka 3 ring ajeng.
- da. Wenang sareng prajuru desa nabdabang pangerencana-pangerencana sane patut kamargiang olih Prajuru Desa.

KELIHAN MANCAGRA.

- ha. Wenang ngenterang Angga Mancagra ring sajeroning ngemargiang kawenangan sekadi ring ajeng.
- na. Wenang ngamedalang pamutus madasar antuk kawicaksanan lan praside kacumpuang olih Angga Mancagra.

PATAJUH/PANYARIKAN/ PATENGEN MANCAGRA :

- ha. Wenang nyelidihi Kelihan Mancagra, manut ring pituduh miwah manut ring kawigunannyane.

- na. Wenang sareng midabdabang kawentenane ring Desa Adat Mengwi, manut sekadi sane menggah ring Awig-awig.

(2). SWADHARMANING MANCAGRA :

- ha. Mikayuning, meligbagang lan nabdabang pengerencana sakeluwiring sane kabuatang ring sajeroning wewangunan sane kapisatang.
- na. Ngabih Kelihan Desa Adat ring sajeroning ngelaksanayang swadarmannyane.
- ca. Ngawentenang pamaratiyaksa ring pangelaksanan sakaluwiring usaha nincapang keparahitan Krama Desa Adat Mengwi.
- ra. Satunggil paparuman Mancagra kapatutang mangda mabusana adat madya, manut kawigunannyane.
- ka. Manut kabuatan Mancagra kangkat ngawentenang paparuman sekirang-kirangnyane ping papat sajeroning awarsa.
- da. Mancagra patut nguningayang indik swadharmannyane nitenin pemargin Desa selaminnyane awarsa sane sampun memargi ring sajeroning paruman Desa Adat.

KELIHAN MANCAGRA :

- ha. Swadharmaning Kelihan Mancagra, kapatut pikukuh ngambelang miwah niwakang bebawos ring Desa, mangde anut ring kawentenan, anut ring Awig-awig, anut ring Perarem, miwah anut ring Dresta tur mangda medasar antuk paetangan Tri Pramana.
- na. Mangda tiaga ngalaksanayang pangelokika miwah mangda piteleb kemawasane ring Desa, mangda sida nemu kerahajengan miwah kaselunglungan patunggalane ring sajeroning Desa.
- ca. Maweh tuntunan ring Angga Mancagra, miwah maweh tatuladan sakebuatan.
- ra. Mangda pitetes, piteleb, tiaga wiadin nitenin sehananing druwe-druwe Desane.
- ka. Mangda maweh sasuluh ring para Angga Mancagra, mangda sami prasida mikukuhin miwah ngagemin Agama, Budaya lan Adat Istiadat.

PATAJUH MANCAGRA :

- ha. Mangda setinut mesarengan ring Kelihan Mancagra, ring sajeroning midabdabang utawi ngarencanayang miwah ngelanturang saluwir pewangunanne, miwah nyarengin ngardi kasukertan lan kerahajengan ring Desa.
- na. Mangda nyarengin Kelihan Mancagra ring sajeroning mitetes, piteleb ring padruwen Desane, miwah sane sewosan manut kawigunannyane.

PANYARIKAN UTAWI JURU CARIK MANCAGRA:

- ha. Mangda siaga ngardinin kejangkepan eka-likita Mancagra manut uger-uger, miwah katekaning rumaksa kawentenane.
- na. Mangda satinut nyarengin nyanggra sakeluwiring karya, miwah nyarengin ngardi kasukertan lan kerahajengan ring Desa.
- ca. Mangda siaga ngarencanayang paruman, miwah nyurat perarem sane kasungkemin ring sajeroning kawentenan paruman.

PATENGEN UTAWI JURU RAKSA DRUWEN MANCAGRA :

- ha. Mangda tiaga ngeraksa Padruwen Mancagra, lan ngawentenang atur piuning ring paruman Mancagra.
- na. Mangda setinut nyarengin nyanggra sakeluwiring karya, miwah nyarengin ngardi kasukertan lan kerahajengan ring Desa.

Pawos 17

Indik Petiyas Utawi Olih-olihan Mancagra

Mancagra Ngemolihang :

- ha. Luput ring ayah-ayahan pakraman miwah pepeson ring Desa Adat.
- na. Petiyas wiyadin olih-olihan sewosan manut perarem Desa.

Pawos 18.

Indik Ngentosin Mancagra

Mancagra Desa Adat Mengwi kagentosin :

- (1) Wit sangkaning nemu pati.
- (2) Wit sangkaning mapamit madesa adat, nenten mewali malih
- (3) Wit sangkaning pinunas ngeraga, majalaran kehanan pinungkan, miwah wit sangkaning sampun puput galah madege dados Mancagra.
- (4) Wit sangkaning kanorayang antuk Desa.

Pawos 19

Indik Pecalang

- (1). Ring Desa Adat Mengwi kaadegang pecalang sane kajudi saking suwang-suwang banjar.
- (2). Swadharmaning Pecalang ngewantu Prajuru Desa ring sajeroning ngulati katreptian.
- (3). Pecalang ngamolihang :
 - ha. Luput ring ayah-ayahan desa mwah papeson ring Desa Adat
 - na. Petiyas utawi olih-olihan sewosan manut perarem desa

Palet 3
Indik Kulkul
Pawos 20

- (1). Kawentenan Kulkul Ring Desa Adat Mengwi, luire :
- ha. Kulkul Desa.
 - na. Kulkul Banjar.
 - ca. Kulkul Tempekan Banjar.
 - ra. Kulkul Sekaa-sekaa.
- (2). Tabuh Tatepakan Suwaran Kulkul Desa/Banjar :
- ha. Tabuh “Banban – Keras – banban” tengeran mekarya utawi medal parum (petabuhe atulud).
 - na. Akelentungan tengeran aputera.
 - ca. Tigang kelentungan, angelayat (Ngerorod).
 - ra. Banban atulud, tengeran nemu pati (seda).
 - ka. Bulus mapanjang, tengeran baya ketunuan.
 - da. Bulus Kenceng :
 - 1). Atulud, kehanan baya kecolongan (kemalingan), kedusta, ketetehan (kerubuhan), kehilangan warga, anyud (kelebok ring we), ngamuk keamuk, muwah saluwiring baya sane sewosan.
 - 2). Duwang tulud, kawentenan bayane kadi menggah ring ajeng (1) sampun berat kawentenane.
 - 3). Tigang tulud, bayane sampun mangetang / mebayapati.
 - ta. Ring sampune puput patetulunge saking krama, patut wenten pangewali: suwaran kulkul banban tadah mepanjang atulud. Inggih punika nganinin sane menggah ring ajeng (hurup ka, da).

- (3). Kulkul Desa utawi Kulkul Banjar tan wenang katepak yan tan sangkaning pituduh Prajuru Desa utawi Prajuru Banjar, sejabaning tengeran ke panca baya.
- (4). Sang sane nepak sangkaning tan pituduh, patut digelis ngawentenang atur supeksa maka kabuatan panepake. Yan nenten sapunika kawenang sang mamurug kedanda manut perarem.
- (5). Petabuh kulkul sekaa-sekaa miwah kulkul pondokan tan kawenang matehin tatepakannyane kulkul Desa miwah kulkul Banjar. Yening wenten memurug keni danda manut perarem.

Palet 4

Indik Paruman

Pawos 21

- (1). Paruman krama Desa kawentenang nyaberan awarsa apisan
- (2). Kengin kawentenang paruman padgata kala, nganut kabuatan ring Desa miwah yening wenten pekarsa saking sang rumaga Guru wisesa.
- (3). Paruman Prajuru Desa utawi Mancagra manut kawigunannyane.
- (4). Kawentenan paruman Krama Desa, medudonan kadi ring sor :
 - ha. Kamanggala antuk tengeran kulkul.
 - na. Paruman Desa Kamiletin antuk Krama Pengarep utawi penyeledihi ipun ring suwang-suwang karang ayahan.
 - ca. Sang sane jagi ngamiletin paruman, mangda saha busana adat (nyelemopot) tur tan kalugra makta gegawan sakeluwire.
 - ra. Kaseregepin antuk bebanten minakadi cane miwah canang sari tur risampune pada seregep muwah pada rawuh, mangda sareng sami ngaturang pangerastiti nunas kerahajengan ring Ida Sanghyang Widhi Wasa, maduluran antuk bebantenan ajangkepan, cane miwah canang sari ring ajeng
 - ka. Ring sajeroning paruman, tan kalugera ngamedalang bawos gora utawi biyota. Yen wenten asapunika patut kekeniang pamidanda pecamil kadi dandaning nguman-uman, manut perarem.
 - da. Paruman miwah pemutus bebawos, sane presida keanggeh :
 - 1). Yan sampun peresida pengerawuh krama makuehnyane $\frac{1}{2}$ (atenga) lintang saking gebogan kramane sami.
 - 2). Yening tan prasida rawuh sekadi angka 1) ring ajeng, paruman kewangdeang. Selantur ipun paruman kalaksanayang malih asasih yadiastun krama tan prasida rawuh kadi angka 1) ring ajeng.
 - 3). Indik pamutuse mangda sida rarem sami, sekirang-kirangnyane $\frac{3}{4}$ saking gebogan krama sane ngamiletin peparuman.

- 4). Yan prade tan nemu pamutuse kadi kaungguh ring ajeng, mangda Prajuru Desa lan Prajuru Banjar mawiweka (mapaetangan) sakabuatan, sekirang-kirangnyane mangda polih keraremin antuk $\frac{1}{2}$ (separo) lebih saking gebogan krama sane parum. Yen tan taler kapresida keatur ring sang rumawos.

Pawos 22

- (1). Ring sajeroning paruman krama Desa kapatutang :

- ha. Kelihan Mancagra, mangda ngawentenang atur piuning majeng ring krama Desa indik panureksan, nganinin indik pemargin Prajuru Desane ngindikang padruwen desa lan pemargin pangerencana-pangerencana sane sampun kahingkupin olih krama desa ring sajeroning awarsa sane sampun lintang.
- na. Kelihan Desa Adat utawi Prajuru Desa, mangda ngawentenang atur piuning (nyiarang) ring krama Desa indik kawentenan pemargin ida/dane ring sajeroning ngenteran desa, pamekas ring indik :
 - 1). Harta brana druwen Desa.
 - 2). Indik pemargin pangerencana utawi pewangunan sane sampun kamargiang ring Desa.
 - 3). Indik pangerencana (pidabdab) nganinin usaha-utsaha Desa kapungkur.

- (2). Pamutus Paruman Desa sinanggeh Perarem, maka pamitegep pamargin Awig-awig.

Pawos 23

Paruman Prajuru Desa

- (1). Sangkepan utawi paruman Prajuru Desa kasarengin antuk Mancagra kawenang ngarencanayang pidabdab pangerencana usaha-utsaha Desane kapungkur.
- (2). Sangkepan utawi paruman Prajuru Desa lan Mancagra tan kawenang ngamedalang tetibak tetegenan ring krama Desane, sedereng kahingkupin antuk kramane.
- (3). Sangkepan utawi paruman Prajuru Desa, ngawetuang pasuwara maka pangelantur perarem desa , tur kengin taler manut kawentenan, saha keraremin antuk Prajuru sami, minakadi Mancagra, Kelihan-kelihan Banjar miwah mawit pituduh sang ngawiwenang (Guru Wisesa).

- (4). Paruman Mancagra sanistannyane patut kawentenang ngawarsa apisan sadurung paruman Desa, masengker sasuwennyane 14 rahina saking paruman Desa, sajawaning wenten mabuat sane kaparumang

Palet 5

Indik Druwen Desa Adat Mengwi

Pawos 24

Druwen Desa Adat Mengwi Inggih Punike :

(1). Pura – Pura (Kahyangan) :

ha. Pura Khayangan Tiga (Pura Puseh, Desa, Dalem).

na. Pura Penataran.

ca. Pura Candi.

ra. Pura Prajapati.

ka. Pura Kedaton.

da. Pura Melanting.

ta. Pura Taman Beji Mumbul

sa. Pura Dalem Rare

(2). LPD Desa Adat Mengwi, Pasar Desa Adat Mengwi, pertokoan ring wewengkon pasar Desa Adat Mengwi, lan Bencingah Mengwi. Naler pertokoan baler margi Pasar Mengwi saking dangin margi perempatan pasar Mengwi rauh dauh kantor Camat Mengwi.

(3). Yayasan Widhya Brata Desa Adat Mengwi

(4). Tanah-tanah pekarangan sane kawigunayang :

ha. Genah wangunan Sekolah Dasar No. 1 (Br Pengiasan) lan 2 (Br Gambang) Mengwi

na. Genah wangunan Pasar Seni.

ca. Genah wangunan Koperasi PKK Desa Mengwi.

ra. Genah wangunan Gedung Kertha Gosa.

ka. Genah wangunan Kantor Camat Mengwi.

da. Genah wangunan Kantor Unit Pelayanan Teknis Dinas Pendidikan Kecamatan Mengwi.

ta. Genah wangunan Kantor Kepala Desa Mengwi.

sa. Genah wangunan Pura-pura Pemaksan Banjar :

- 1). Pura Dalem Baturenggong.
- 2). Pura Purna.
- 3). Pura Taman Sari.
- 4). Pura Dalem Bekak.
- 5). Pura Ujung.
- 6). Pura Dalem Bajera.
- 7). Pura Penataran Pande Dalem Batur Jati
- 8). Pura Beji Dangka
- 9). Pura Beji Taman Kaulu
- 10). Pura Dalem Batan Kemoning
- 11). Pura Sakti
- 12). Pura Taman Ganter

wa. Genah wangunan Pagenahan Camat Mengwi lan wangunan pagenahan Puskesmas Pembantu Mengwi.

la. Pura-pura Pemaksan Dadia :

- 1). Pura Dalem Semawa.
- 2). Pura Batan Nyuh.
- 3). Pura Ganggangan.
- 4). Pura Kebayan.
- 5). Pura Panti.

- 6). Pura Pasek.
- 7). Pura Gunung.
- 8). Pura Dalem Gelgel.
- 9). Pura Alit.
- 10). Pura Dalem Jambangan.
- 11). Pura Penataran Giri Kesuma.
- 12). Pura Batur Sari.
- 13). Miwah Sanggah/Pemerajan Karyan Batu Banang.

ma. Keangge pagenahan Bale Banjar, rawuhing kegenahan Parhyangan Pengulun Banjarnyane, sakuwub sawewidangan Desa Adat Mengwi (Telulas Banjar). Sajabaning pagenahan Bale Banjar Pandean lan parhyangan pangulun banjarnyane

- (5). Karang ayahan desa, akehnyane 703 karang ayahan. Karang ayahan Desa puniki tan wenang kepah malih
- (6). Setra-setra minakadi : Setra Ageng, Setra Brahmana, Setra Rare, sejabaning Setra Pandean lan Setra Bajra kewawa antuk banjar sakewanten pemargin atiwa-tiwa kaputusan olih Desa
- (7). Tanah druwen Desa Adat Mengwi cacahnyane :

ha. Tanah Sawah ring Subak Bulan (4 petak) :

- (1) Sertipikat No : AW 427963 ; SPPT No. 51.03.020.008.013-0040.0; luas = 19,80 are; penggarap : Wayan Bhakti (Br Kedua Baha)
- (2) Sertipikat No : AW 427966 ; SPPT No. 51.03.020.008.014-0054.0; luas = 23,70 are; penggarap : Wayan Sadra (Br Alangkajeng Mengwi)
- (3) Sertipikat No : AW 427961 ; SPPT No. 51.03.020.011.001-0031.0; luas = 13,80,80 are; penggarap : Wayan Sadra (Br Alangkajeng Mengwi)
- (4) Durung mesertipikat; luas ± 10 are; penggarap : Wayan Bawa (Br Angkeb Canging)

na. Tanah Sawah ring Subak Tungkub Mengwi :

- (1) Sertipikat No : AW 427960 ; luas = 22,20 are (ring genahnyane Bpk Gading Br Lebah Pangkung)
- (2) Sertipikat No : AW 427962 ; luas = 11,10 are (ring baler jalan pengawasan)
- (3) Sertipikat No : AW 427964 ; luas = 11,50 are (ring dauh Br Delod Bale Agung, dauh jelinjingan)
- (4) Sertipikat No : AW 427965 ; luas = 27,50 are (ring baler margi ke Pura Ujung)
- (5) Sertipikat No : AW 427967 ; luas = 7,10 are (ring delod Setra Mengwi, dangin telabah)
- (6) Sertipikat No : AW 427968 ; luas = 3,70 are (ring delod Setra Mengwi, dauh telabah)
- (7) Sertipikat No : AW 427970 ; luas = 7,00 are (ring dauh Br Delod Bale Agung, dangin jelinjingan)
- (8) Tanah sawah during mesertipikat; luas = $\pm$ 16,00 are (ring dauh Bale Timbang Ujung Tengah)

ca. Tanah tegalan laba Pura Kedaton $\pm$ 70 are\

ra. Sane sewosan marupa ilen-ilen miwah busana (pengangge) ring Pura Khayangan Tiga utawi ring pura penyiwian desa.

- (8). Sakeluwiring druwen-druwen Desane mangde kategepin saha lekita, maliha tan wenang keadol miwah kegadeyang, yan tan polih kaingkupan (kerareman) ring Desa.
- (9). Usaha-utsaha tiosan minakadi : LPD Desa Adat Mengwi, Pasar Desa Adat Mengwi lan Yayasan Widya Berata Desa Adat Mengwi.

Palet 6
Indik Sukerta Pamitegep
Kaping 1
Karang, Tegal lan Carik

Pawos 25

- (1). Pangemong karang ayahan desa patut nyengkerin karang inucap antuk tembok miwah sadurunge kasidan kengin antuk pagehan entik-entikan. Pamekas ipun mangda sida masengker tur mangda sida becik pekantenane. Semaliha mangda sida adung (anut) ring penyanding.
- (2). Pedum sasengkeran : wates sasengkeran kangin miwah kaja patut kekaryanin antuk sang sane ngemong karang inucap, inggih punika mewasta megaleng kaluwan.
- (3). Yan mungguwing ring tegal miwah carik (sawah), wewatesan sane kepatut kekaryanin antuk pangemongnyane : sisi (wates) kelod miwah kawuh. Inggih punika mewasta magaleng kateben.
- (4). Suwang-suwang karang paumahan patut polih pedum margi medal mangda sampunan wenten karang kabebeng.

Pawos 26

Sinalih tunggil krama Desa miwah Banjar nenten kalugra :

- (1) Ngalah-alah margi, ngerusak margi miwah katekaning pekarangan, tegalan, pesawahan paderben anak sewos.
- (2) Ngalah-alah tanah druwen desa, tanah setra, tanah Pura, yadiastu tanah sane sewos-sewosan, sane tan gumanti paderbennyane, miwah sekancan tanah sane kesinanggeh suci.
- (3) Yening wenten prade sane mamurug, sang sane mamurug patut ngudalang tanah inucap tur saha keni danda sepatutnyane manut perarem kadulurin keni upakara bebantenan sepatutniya.
- (4) Tanah laba pura lan laba druwen desa sane siyosan tan wenang kadadosang karang paumahan

Kaping 2

P e p a y o n a n

Pawos 27

- (1). Tetanduran tanem tuwuh ring sajeroning pekarangan, miwah ring sajeroning panegalan, patut mapehembang saking tembok (sasengkeran) adepa agung ngajerowang.
- (2). Perade wit tetanduran inucap, wiyadin rerembiyakan papah miwah carangnyane, ngelintang ring pawatesan miwah keteka tekeng tarune, tetanemane sane sewosan, wenang kasepat gantungan tur sang sane mederbe patut ngerabasin, notor wiyadin memunggul (memonggol).
- (3). Yening wenten taru sane kasinanggeh jagi mayanin ring pekadinnyane miwah majeng ring anak sewosan, punika patut segelisa kawentenang paigum tur mangda kaicenin pematut saking desa utawi banjar, manut kawentenaniya :
 - ha. Yening taru inucap sampun patut tetanduranniya, sang merasa ring baya patut nawur penumbas taru sepatuta.
 - na. Yan taru punika tan manut tetanduranniya, tur sering sampun kepewarahin, saking penanduranniya, punika patut sang mederbe ngebah segelisa.
 - ca. Mangda nenten jantos ngawetuang baya tur nenten matang penawuran sepatute, kemawon patin pepayonane kewanen ketawur manut pangelokika kewanen.
 - ra. Prade sampun kewala saking sang sane merasa baya, kejantenane saking sang sane maderbe tarune nenten ngelaksanayang, sang sane merasa kebaya mangda digelis ngatur uningang ring Prajuru Desa/Banjar. Pidaging sang Prajuru mangda digelis melaksana manut tatepas awig-awig utawi perarem.
 - ka. Yening tan katinutin antuk sang maderbe kayu, sang inucap wenang kedanda manut perarem. Selanturnyane Prajurune patut melaksana.
 - da. Sang sane keni pamidanda penyanggaskara saha prebiya manut perarem, harep ring wewangunan sang sane kerubuhin luwire :
 - 1). Sang neruwenang pepayonan (taru), wit sinanggeh mayanin perade pungkut ngarubuhin wewangunan krama sewos.
 - 2). Sang sane monggol, notor utawi ngerebah taru tur ngerubuhin krama sewos.

Kaping 3

W e w a n g u n a n

Pawos 28

- (1). Nyabran mekarya wewangunan ring pekarangan utawi ring suwang-suwang genah sane keanggen paderwean desa kepatut :
 - ha. Ngatur piuning ring Prajuru Desa utawi Banjar, mangda kapitetesang genahnyane, mangda nenten ngardi wiyadi kapungkur.
 - na. Mangda anut ring pituduh, ngangge paetangan Asta Bumi, Asta Kosala-Kosali miwah mangda anut ring patitis niskala. Ngawentenang genah pangastiti ring Ida Sanghyang Widhi Wasa.
 - ca. Toyan capcapane tan kepatut jantos nganinin tembok wewatesan, bilih-bilih jantos ngekeb wewangunan ke penyanding, kepisaga miwah kemargine.
 - ra. Tembok wewangunane mangda ngangge paembang saking tembok wewatesan pekarangan adepa agung sajawaning wenten paigum ring sang sane nyanding.
- (2). Yening wenten sinalih tunggil kramane sane mamurug wenang katibakang pamidanda, manut perarem.

Kaping 4

Wewalungan

Pawos 29

- (1). Sehanan krama utawi warga Desa, sane ngubuh saluwiring wewalungan mangda sami siaga yadiastu saluwiring ingo-ingon, mangda katitenin mangdane tan jantos ngerusak (ngerusakin) tegalan, pesawahan, pekarangan, minakadi tetanduran (paabianan) krama sane sewosan, bilih-bilih jantos ngeletehin karang suci / khayangan.
- (2). Tan kapatut malelumbaran muwah meangon-angonan ring margine, miwah ring genah-genah sane kasinanggeh suci wiyadin ring genahe sane gumanti ketreptiang.
- (3). Yening prade wenten wewalungan malumbar utawi ngeleb, ngarusakin tetanduran, paabianan ring sakuwub pakarangan, panegalan, pesawahan krama sewos, wenang ketaban tur kedanda, ngewaliang wit sane rusak, sane keteda saha nawur penebas tetabanan sepatute manut perarem tur maweweh panukun pengingonnyane.
- (4). Munggwing wewalungan sane ketaban inucap ring ajeng (angka 3) patut kabecikang pagenahnyane antuk sang sane naban tur mangda kapiuning ring Prajuru Desa utawi Banjar. Pidaging sang Prajuru ngerawuhang ring sane maderbe.
- (5). Yen prade wenten wewalungan punika jantos ngaletehin genah suci, minakadi khayangan miwah sane sewos-sewosan, tatiwake ring sang sane neruweyang sewos ring bebanten sepatute nganutin genah.

Kaping 5

Bhaya

Pawos 30

- (1). Pariindik bhaya / Panca Bhaya minakadiniya :
 - ha. Bhaya Ketunuan
 - na. Bhaya Keblabaran
 - ca. Bhaya Kerubuhan
 - ra. Bhaya Kemalingan

- ka. Bhaya Kedusta/Keamuk, miwah sane sewos-sewosan sane kasinanggeh bhaya, pamekasnyane jiwa bhaya.
- (2). Sang sane manggihin sehananing katibaning bhaya/jiwa bhaya, patut maweh patulung saha nepak kulkul bulus, manut kadi tetabuh ring ajeng (pawos 20) manut kawentenanan bhayane tur para kramane patut maweh patulung sakabuatan.
- (3). Ring genahe sane keanan bhaya, ring pradene jantos wenten sane nemu pati, kapatut ring genah inucap kawentenang pecaruan manut ungguhan. Majeng ring sang sane mayanin keatur ring sang guru wisesa.
- (4). Yening wenten krama Desa miwah Banjare sinalih tunggil melaksana ngawag-ngawag, minakadi nguman-uman mamisuhin ring anak sewos, napi malih majeng ring Desa miwah ring Banjar, miwah majeng ring sekaa-sekaa, kepatut jadmane punike kakenen danda manut perarem. Bilih-bilih jantos nantang bhaya. Yen pelaksanannyane ring genahe suci, pamidanda maweweh ngaturang upakara bebantenan sepatutnia.

Pawos 31

- (1). Sapretingkahe mapaelon ring dusta wiyadin corah, kasinanggeh saruron ring dusta / corah, minakadiniya pamargine manut pawilangan Asta Dusta miwah Asta Corah luwirniya :
- ha. Maweh Patuduh.
na. Maweh Pamargi.
ca. Maweh Senjata miwah perabot sane sewosan.
ra. Ngengkebang.
ka. Ngedengang.
da. Metulung.
ta. Ngadolang Barang.
sa. Tan Sadu Miwah Maweh Bawos Adua, Mapaelon ring Idusta/Imaling.
Sang sane asapunika patut kakenaning danda manut perarem, tur ngewaliang barang-barang sane kacorah.
- (2). Yen pelaksanane nyorah majeng ring pura-pura miwah ring genahe sewosan sane kasinanggeh parhyangan wiyadin suci, kekenan pamidanda maweweh upakara bebantenan sepatutniya tur ngentosin barang sane kemaling utawi kepandung
- (3). Yen prade icorah wang saking dura desa, semaliha tan suka ipun nerimanin pamidanda saking Desa, pidaging icorah keatur ring sang rumawos. Yen prade wenten saking krama wiyadin warga desa sane ngamiletin pemarginnyane icorah, pamekas kramane sane

ngamiletin, punike katetehin ring pamidanda sapuputnyane (kadi menggah ring angka 2 pawos 31).

(4). Sepertingkahe sane kasinanggeh corah luwirniya :

- ha. Yening ngambil sakeluwiring barang wiyadin arta brana paderben anak sewos, tan sangkaning sadu miwah sangkaning tan katuduh.
- na. Yaning ngeranjing miwah medal, mekaon saking paumahan (puri, geriya, jero, jeroan) anak sewos tan pasadu, ring pradene ring genah inucap kaicalan, pidaging sang sane ngeranjing miwah medal tan pasadu punika, kengin katuduh. Sapunika taler yen kanjekan ngeranjing ring paabianan anak sewos. Sang sane keranjingin kengin nunas pasosot ring sang sane ngeranjing miwah medal inucap.
- ca. Mangda nenten jantos katuduh corah, miwah tan jantos kakenaning pasosot (sumpah), asing-asing ngeranjing ke genah anak sewos, kapatutang :
 - 1). Ngeranjinge saha patengeran suwara (mageluan), jantos sang sane neruwenang genahe wenten sane rawuh, utawi ngerereh pesaksi ring penyanding.
 - 2). Yen prade pemargine saking utusan Prajuru Desa / Banjar, ngemargiang arah-arah, ring budale mangda nagingin sawen ring pamedalan utawi pamesuwan sang sane kearahin, maka cihna wenten arah-arah saking Prajuru, rikanjekan suwung.

Kaping 6

Penyanggeran Desa Miwah Banjar

Pawos 32

(1). Krama Desa miwah Krama Banjar rikala ngawentenang :

- ha. Karya pasuka-dukan, manut perarem keselunglungan ring Desa utawi Banjar. Yen kebuwatang antuk sang sane ngewangun karya, patut kasanggra antuk Desa utawi Banjar suwang-suwang.
- na. Pamekas yan prade pemangku khayangan Tiga, sane kari jejer ngemangkunin ring among-amonganniya raris ngemasin pati, pidaging gumanti punika polih penyanggra saking krama Desane sami ngelantur maweh dana, gumanti angge penyanggra prebiya pamuputnyane pelaksana Pitra Yadnyaniya, manut perarem tur tan pesangu.
- ca. Yan majeng ring krama, mungguwing dana patetulungane miwah nganinin penyanggera (papeson) sang sane mederbe karya (yadnya) majeng ring krama manut perarem ring suwang-suwang Banjar.
- ra. Sane kasinanggeh karya pasuka-dukan (karya suka-duka) minakadin ipun :
 - 1). Dewa Yadnya.
 - 2). Resi Yadnya.
 - 3). Manusa Yadnya,
 - 4). Pitra Yadnya.
 - 5). Bhuta Yadnya.

CATURTHAS SARGAH

SUKERTA TATA AGAMA

Palet 1

INDIK DEWA YADNYA

Pawos 33

Kewentenan pelaksanaan Dewa Yadnya ring Desa Adat Mengwi :

- (1) Ring Pura Kahyangan Tiga : Pura Puseh, Desa, Dalem kasanggra antuk Desa Adat
- (2) Ring Pura – pura sane sewosan, sane kasinanggeh penyiwian desa : Pura Penataran, Pura Kedaton, Pura Candi, Pura Praja Pati , Pura melanting, Pura Beji Mumbul Mumbul lan Pura Dalem Rare kasanggra antuk Desa Adat.
- (3) Ring kekuwub bebanjaran ring Pura Pemaksan Banjar miwah Penguluning Bale Banjar kasanggra antuk pemaksan/banjar suwang-suwang
- (4) Ring Kakuwub Krama, ring Sanggah/ pamerajaniya, ring Panti Paiboniya miwah ring kawitan Leluhurniya kasanggra antuk pemaksan suwang-suwang.
- (5) Ring kanjekan pererainan jagat, minakadi : Galungan, Kuningan, Pagerwesi, Saraswati miwah ring rahina-rahina sane sewosan sane sampun kasinanggeh rahina suci/puja walin Ida Sang Hyang Widi kasanggra antuk krama suwang-suwang
- (6) Pengaci/Upakara Dewa Yadnya, nganutin Sastra Dresta Agama, saha pelaksanannyane nista, madya, utama manut kawentenannyane
- (7) Mungwing pemargine sane ring Pura-pura/ Parahyangan sane menggah ring ajeng (1). (2), (3),(4) Pawos 33 manut kanjekan rahina piodalan suwang-suwang

Pawos 34

- (1). Ring suwang-suwang Pura inucap kawentenang Pemangku
- (2). Ngadegang pemangku nganut dudonan, kadi ring sor :
 - ha. Pengambile saking turunan/ warisan
 - na. Saking pilihan Krama Pemaksan suwang-suwang
 - ca. Mepinunas ke Widi/ Niskala, pamekas ring ajeng linggih Purane sane jagi kagentosin pemangkuniya

- (3). Ring kanjekan ngadegang pemangku mangda saha Upakara
- (4). Tan kawenang angge pemangku :
 - ha. Ceda angga
 - na. Sang sapa sira ugi, sane tan kepatutang antuk Pemaksan suwang-suwang/ Perarem
- (5). Prebiya kepemangkuan :
 - ha. Pediksan, Pewintenan, Upasaksi ke Widi, miwah sane sewos-sewosan sami kesangga/ kesanggera antuk pemaksan suwang-suwang
 - na. Kawekas kalaning I mangku nemu pati kepatut keraremin antuk para pemaksan miwah penyiwi Pura sane kepemangkuin (kemangkunin) sakesidan manut perarem

Pawos 35

Pemangku kagentosin riantukan :

- (1) Nemu pati
- (2) Mawit saking pinunas ngeraga
- (3) Gumanti kauwusang olih Krama/ pemaksan
- (4) Yan I Pemangku mawit kauwusang olih Krama, melarapan saking melaksana tan patut, minakadi sane kasinanggeh : asta corah miwah kecuntakan kecemeran, keni pemiidanda manut perarem utawi putusan sang rumawos

Pawos 36

Swadarmaning Pemangku, luwirniya :

- (1) Nyanggra seluwiring Upakarane (Upacarane) ring Pura/kahyangan miwah rawuhing ring para Krama suwang-suwang manut kebuwatan
- (2) Rumaksa katekaning nureksain kawentenan ring Pura , minakadi ngerajegang kesuciane ring Pura
- (3) Pemangku tan keneng Cuntaka
- (4) Yen perade rikalaning wenten karya ring Pura, ring genah I Pemangku ngayah madeg Pemangku, kandugi wenten raris warganiya ring pagenahannyane lampus, sewos ring rama renaniya miwah anak putuniya temen, sang Pemangku tan kengin mepamit budal saking Pura

- (5) Yen prade salih sinunggil I Pemangku kapialang, kengin saking Prajuru Desa ngangge Pemangku sane sewosan, tur pengambile keutamayang saking sinalih tunggil Pemangku Kahyangan Tiga
- (6) Sang Pemangku patut nginutin pituduh kadi linging Kesuma Dewa miwah ucapan Sangkul Putih miwah Darma Dresta Agamane sane sampun kasinanggeh

Pawos 37

Petiyas utawi olih – olihan Pemangku Pura Kahyangan Tiga lan Pura Penyiwian Desa :

- (1) Epahan sarin canang ring Pura miwah olih-olihan sarin canang/banten sane kepuputang ring suwang-suwang ungguhan Krama
- (2) Pamupon pelaba carik miwah tegal
- (3) Luput pekaryan pekraman miwah peson-peson ring Desa
- (4) Sewosan olih-olihan ring ajeng I pemangku taler kawehin patiyas saking Desa manut perarem

Pawos 38

Kasukertaning Kahyangan kadi sor :

- (1) Tan kelugra ngeranjing ke Pura luwire :
 - ha. Saking ketiban cuntaka mawit kepatian, nganutin Catur Cuntaka
 - na. Sang wadon kacuntakan ngawit angeraja, laminnyane yan tan kapialang wantah 3 dina utawi selaminnyane sekantun ngemedalang rah
 - ca. Mawit sangkaning aputera. Cuntaka sang lanang 12 dina, sang wadon 42 dina
 - ra. Sebel pengantenan, salami sedurunge mebiyakala
 - ka. Miwah sane sewos –sewosan manut perarem Desa
- (2) Pelaksana sane tan wenang ring Pura :
 - ha. Mesumpah ring Pura yan tan sangkaning waranugraha utawi petuduh saking Prajuru Desa
 - na. Anguyuh, angising, asanggama, memisuh, ngawe wiyadi, metetangkilan (mekemit) awor peturuaniya lanang wadon
 - ca. Makta sehananing barang sane kasinanggeh ngeletehin

- ra. Sarwa suku pat, sejabaning rikala meangge upakara/ mepepada
 - ka. Mabusana tan manut kadi tata caraning ngeranjing ke Pura
 - da. Mungguh tedun ring pelinggih, miwah ngaturang banten ndewek-dewek yang tan petuduh Prajuru miwah Pemangku
 - ta. Tan kalugra wang edan, wang gering agung miwah wang ketiban sakit rahat ngeranjing ke Pura
- (3) Sang memurug kadi kecapin ring ajeng, keni pamidanda manut perarem tur saha ngaturang bebanten sepatutnyane

Pawos 39

- (1) Yen perade wenten jadma kerawuhan ring Pura, patut kepintonin olih pamangku. Yan dudu pelaksananiya, wang inucap ketiban danda tur saha ngaturang upakara sepatutniya. Pamidandaniya manut perarem
- (2) Yen prade ring Pura/ Kahyangan, durmenggala wiyadin sapunapi ugi kawentenane mangda digelis I Pemangku ngerawuhang/ nguningayang ring Prajuru. Segelisa mangda kewentenan Upakara

Palet 2

INDIK RESI YADNYA

Pawos 40

- (1). Sewos ring Pemangku, sang pacang madeg Pandita, Resi, Empu, Dedukun, Sonteng, Dalang miwah sakeluwiraning sane jagi ngenterang Upakara (bebanten) Yadnya, patut ngerawuhang ring Prajuru tur nguningayang ring sang rumawos
- (2). Prajuru patut nureksain kewentenane sang sane jagi mediksa. Ring perade wenten kapihambeng/kapialang, kepatut I Prajuru ngerawuhang nguningayang ring sang rumawos

Pawos 41

- (1) Sang sulinggih patut ngutamayang pemargine ring Desa
- (2) Krama Desa mesarengan ring Prajuru patut setinut jagi mapidabdab, ngenterang mangda sida sakeluwiring Yadnyane memargi sepatuta, tur mangda polih pamuput sakebuwataniya.

Palet 3

INDIK PITRA YADNYA

Pawos 42

Pemargin Pitra Yadnya medudonan kadi ring sor :

- (1). Upakara majeng ring sang nemu pati/ seda :
 - a. Mapendem utawi mageseng, minakadiniya mekingsan ring Ibu Pertiwi, miwah ring Ida Sang Hyang Brahma tur layuan sang nemu pati patut saha pangentas
 - na. Atiwa –tiwa (meabenan), manut pewacakan Pancatma Pratista, Widi Sastra miwah sane sewosan
 - ca. Yan jaga nusang layon/ melelet indik dudonaniya mangda nginutin tutur Pan Brayut
- (2). Sepuput karya matiwa – tiwa kadi inucap, nglantur ngelaksanayang pengelemijian, pengerorasan, nyekah/ memukur (mepenileman), katekaning maligia manut kabuatan suwang – suwang

(3). Ring Desa Mengwi kadadosang ngaben utawi nyekah/mamukur ngerit manut perarem

Pawos 43

Swadarmaning muwah tategenan :

- (1) Yen prade wenten sinalih tunggil Krama nemu pati, warga kepatutan sang sane pati/ seda patut :
 - ha. Ngewentenang pengerawuh pesadok pemekas ring Prajuru Banjar, nguningayang kewentenane
 - na. Rawuh panguninge ring Prajuru Desa, gumanti nunas pemargin sang seda miwah nunas genah/setra
 - ca. Mewali ring Prajuru Banjare ngemargiang perarem keselunglungane ring Banjar. Maweh patulung pakaryan miwah dana manut perarem jantos sepuputnyane
- (2) Mungwing penyanggera pesangon majeng ring Krama Banjar, manut dudonan pekaryan miwah dana manut perarem Banjar suwang-suwang

Pawos 44

Ring sajeroning atiwa-tiwa :

- (1). Tan kalugra ngutang sawa kesetrane kanjekan :
 - ha. Piodalan/ pererainan ring Kahyangan Tiga/ Pura Penyiwian Desa
 - na. Kanjekan dina Purnama, Tilem, Prewani, pererainan jagat, Kala gotongan, Semut sedulur miwah kanjekan dinane sewosan manut dresta ring Desa, miwah ring dina dora/ pasah.
 - ca. Tan kalugra sapisanan 3 (tiga) sawa sedina ring setrane asiki. Minakadiniya mapandem yadiyastu mageseng, sejabaning kawewehin antuk ayam selem tur upakara sane sampun kepatutang
 - ra. Tan kengin ngutang sawa ngerahina miwah ngepuanang, sejabaning kesetrane sewosan utawi mekingsan
 - ka. Tan kengin ngetigang dinaan (ngetelunan) nekeh ping 3 (telu)
 - da. Sawaning wang rare tan pangetang dina muwah tan wenang nyekah sawaning rare

(2). Tan kalugra

- ha. Tan wenang nyekeh sawa ring geraha (ring umah), langkungan ring 7 (pitung) dina, yan tan jagi kaperabiyatin (keabenang) tan dados nyekeh langkungan ring amasa (awarsa)
- na. Yening perade wenten sinalih tunggil Krama sane mamurug kadi bebawos larang ring ajeng, keni pemedanda manut perarem tur saha ngaturang Upakara bebanten pemerayascita sepatutniya
- ca. Angawe byuta (megarap) ring sajeroning pemargin pitra yadnya. Yening wenten sane mamurug, banjar inucap kedanda 10.000 jinah kepeng asli

Pawos 45

Mungwing kacuntakan kadi ring sor :

(1) Sebelan kecuntakan mawit saking kepatian:

- ha. Sebel banjar 3 (tigang) rahina
- na. Manut lelintihan ring sang nemu pati, tan langkungan ring 12 rahina

(2) Nganinin sang sewos warga, Banjar/ Desa, sebelane manut kaselunglungannyane nganutin perarem Banjar suwang-suwang

(3) Tan keneng cuntaka :

- ha. Sang Pandita
- na. Mangku Kahyangan Tiga miwah para Pemangku ring Pura Penyiwian Desa
- ca. Prajuru Desa

Pawos 46

- (1) Pelaksanaan karya patiwon – tiwan (pengabenan) manut kebuwatan Krama suwang-suwang, manut kewentenan tur mangda anut ring dudonan, manut ring kekecap Dresta Agama
- (2) Mangda anut pemargi Upakarane miwah mangda setinut ring pemargi Desa

Pawos 47

- (1) Peputusan pengabenan manut perarem Banjar suwang-suwang
- (2) Pesanguan pengabenan manut Dresta/ manut perarem Banjar suwang-suwang

Palet 4

INDIK MANUSA YADNYA

Pawos 48

- (1) Pelaksanaan Manusa Yadnya pengambile ngawit saking wenten bobotan, ngelantur kadi ring sor :
 - ha. Upacara/ Upakara magedong-gedongan, mawit pangerempinian/ mawit wentene cihna bobotan
 - na. Maweh dapetan, ring sampune rarene medal
 - ca. Kanjekan kepus udel
 - ra. Upacara nelahin ring sampune 12 dina
 - ka. Upakara kambuhan (pecolongan) ring tutug 42 dina
 - da. Upakara nigang sasih (nelu bulanin), nyambutin ring tutug 3 (tigang) sasih pamedal rarene
 - ta. Upakara mapetik
 - sa. Upakara pawetonan, ring 6 (enem) sasihe/210 dina
 - wa. Tutug kelih, nganinin sang puteri/wadon, upakara pengerajan (padengen-dengen). Sang lanang mecihna ngembakin, kepatut ngewentenang pawintenan sari
 - la Metatah (mepandes), saha Upakara petatahan
 - ma Mawiwaha, saha Upakara Pewarangan/ wiwaha
 - ga. Miwah sane sewos -sewosan
- (2) Upakara – upakara inucap, nista, madya, utama nganutin Dresta Agama, manut kawentenan muwah kabuatan

Palet 5

INDIK BHUTA YADNYA

Pawos 49

- (1) Bhuta Yadnya, inggih punika upacara-upacara ring pertiwi lan Kahyangan, sarwa prani miwah ring sarwa Bhuta Kala
- (2) Upacara ring sarwa prani luwire :
 - ha. Ring sarwa tumuwuh, rikala dina Saniscara Keliwon Wariga kawastanin dina Tumpek Pengatag
 - na. Ring sarwa ingon-ingon (wewalungan), ring dina Saniscara keliwon Uye, mewasta dina Tumpek Andang
 - ca. Pabiyakala majeng ring kamanusan manut wiguna
 - ra. Pebiyakala ring Pertiwi, Kahyangan miwah ring bhuta Kala kawastanin Caru (mecaru). Pamargine madudonan manut wiguna, nista, madya, utama muwah sakebuwatan suwang-suwang kadi ring sor :
 - 1). Eka Sata
 - 2). Panca Sata
 - 3). Panca Sanak
 - 4). Panca Kelud
 - 5). Resi Gana
 - 6). Tawur Agung
- (3) Sewos ring sane kaucap ring ajeng, kawentenang taler banten jotan nyabran sane kewastanin banten tugu
- (4) Pabiyakala miwah tatebasan pasesapuhan durmanggala, rikanjekan ngaturang aci-aci ring Pura

Pawos 50

- (1) Pecaruan ring dina tileming kesanga, nista, madya utama manut ungguhan, nyabran ngemasa/ ngewarsa Icaka, kewastanin Tawur Kesanga
- (2) Pamargine ring Bale Agung Pura Desa, miwah ring pempatan agung
- (3) Ring dina benjangniya, ngelantur kawentenang Panyepian :
 - ha. Amati Geni
 - na. Amati Pekaryan
 - ca. Amati Lelungan

ra. Amati Lelanguan

- (4) Baberatan inucap kalaksanayang arahina wengi,gumanti nyambut paweweh Tahun Icaka, saking ngawit dina Panyepian inucap
- (5) Sang sapasira ugi mamurug, keni pamidanda.

PANCAMAS SARGAH
SUKERTA TATA PAWONGAN

Palet 1

INDIK PAWIWAHAN

Pawos 51

- (1) Pawiwahan inggih punika, patemoning Purusa lawan Predana, melarapan saking pekayun pada arsa (sukacita) saha kadulurin antuk pesaksi sekala niskala (Tri Upasaksi).
- (2) Pelaksanaan pawiwahan luwirniya :
 - ha. Mawit saking pepinangan (pepadikan)
 - na. Mawit saking ngerorod.
 - ca. Nyentana utawi nyeburin
- (3) Pidabdab sang mawiwaha patut :
 - ha. Sampun manggeh daha teruna (mangda anut ring pidabdab Guru Wisesa)
 - na. Sangkaning pada suka (tan sangkaning wirosa).
 - ca. Tan angelakoni agamiya gemana
 - ra. Yan prade sang lanang lan sang istri mesiwosan agama, kepatut kepastiang riyin patitis sang mawiwaha miwah yan manut Dresta Agama sang Predana kepatut nginutin sang sane kasinanggeh Purusa manut U U Perkawinan No 1 tahun 1974.
 - ka. Pawiwahan sane prasida melarapan saking sang istri gumanti ngulati sentana. Sadurunge mangda kapastikayang pidabdabnyane, mangdane sinah saha ilikita.

Tata pemargi bebawos indik pawiwahan :

(1) Yan prade pamargin mawit papinangan :

- ha. Pangeriyin, saking warga sang lanang rawuh ring ungguhan sang istri, ngamargiang papinangan manut dresta.
- na. Ngelanturang bebawos pasuwakan saha bebuwatan manut dresta, maka cihna papinangan sampun keprasida.
- ca. Pengambilan saha pamuput bebawos pawiwahan, manut sakebuwatan.
- ra. Selamin tata pemargin bebawosane inucap ring ajeng (angka ha, na, ca) sang sane ngemargiang papinangan patut mangda malarapan (majalaran) saking Prajuru Banjar utawi Desa.

(2) Yen pemargin merangkat mawit saking ngerorod, kepatut :

- ha. Saking warga sang lanang sagelisa ngerawuhang ring kepatutan (warga), pamekas ring rama renaniya sang istri, mangda sida kauningin putrinya ngerorod saha majalaran Prajuru.
- na. Indik pemargi pengelakune / pengelukune saking sang lanang nyantosin wangsit saking warga sang istri, minakadi mejalaran suwaran kulkul manut dresta ring ungguhan sang istri. Yang ring Desa Adat Mengwi suwaran kulkul 3 (tigang) kelentungan. Sadurunge wenten suwaran kulkul durung kengin ngerawuhin.
- ca. Ring sampune wenten suwaran kulkul, pamargi pangelukuane saking sang lanang, pengerawuhe mangda mejalaran Prajurun sang istri / Kelihan Banjarniya, tur saha tengeran kekelik maka cihna pemargine gegalangan.
- ra. Yen raris tan kasuwarang kulkul saking sang istri jantos 42 (petang dasa dua) dina, inggih punika maka cihna tan jagi kebawosang. Saking warga sang lanang kengin ngelanturang ilen – ilen pawiwahan sang anten inucap.

(3) Pemargin nyeburin majalaran antuk :

- ha. Pinih riyin patut kawentanang paiguman kulawarga purusa lan pradana, saha kamenggehang pinaka sentana rajeg.

- na. Ring sampun polih kaingkupan pariindik pawilangan sekadi ring ajeng,
kalanturang antuk upacara Widi Wedana manut ring kecap sastra agama.
- ca. pamekas kasaksiang ring prajuru adat lan kailikitayang sapatuta, saha
kasiarang ring paruman krama.
- (4) Pemargin pengelukaan yan sampun pada sekarsa, mungging dudonane pateh kadi inucap
ring ajeng, kadi pasuwakan pepadikan, jantos puput upakara pawiwahaniya, manut dresta
desa kala patra, saha Widiwidana tur sergep saha ilikita saking Guru Wisesa.
- (5) Darmaning perabiyen : sang lanang satiyeng wadu, sang istri mangda tegeng ring pati brata.

Palet 2

INDIK WUSAN MERABIYAN

Pawos 53

- (1) Mawit sinalih tunggil sang lanang utawi sang wadon ngeriyinin nemu pati. Sang sane kari lanang utawi wadon kawastanin : balu.
- (2) Mawit sangkaning palas, mejalaran pada rena pekalian kewastanin : sapihan.
- (3) Wit sangkaning palas, mejalaran antuk wiyadi.
- (4) Sane kebawos ring angka (2) lan (3) mangda manut sekadi ring Undang Undang Perkawinan No. 1 tahun 1974
- (5) Swadarmaning sang palas merabiyon :
 - ha. Sang sane balu mangda ngelanturang kertine ring turunan.
 - na. Sang sane sapihan jagi kepidabdab ring perarem banjar suwang-suwang.
 - ca. Sang sane palas wit sangkaning wiyadi, jagi kepidabdab manut perarem banjar suwang-suwang, tur selantur ipun yan tan keprasida katur ring sang rumawos.
- (6) Yaning wenten anak lanang utawi istri saking Tri Wangsa wusan merabian nyerod tur mewali malih ring kulawarganiya, indik kawentenan sang inucap kasukserah ring kulawarganiya tur kasobyahang ring banjarniya..

Pawos 54

- (1) Yen prade kawekas kejantenane sang palas merabian, mewali adung malih patut ngewalinin ngardi Upakara Widiwidana.
- (2) Kakenan danda manut perarem banjar suwang-suwang

Pawos 55

Swadarmaning Balu

- (1) Sang keanan balu, lanang utawi wadon sane wit keturunan kepurusan, peperasan (angkat-angkatan), lanang hambil-hambilan (sentana nyeburin), wiyadin wadon pecak hambil-hambilan (meperabiyen) kepatut :
 - ha. Ngelanturan pekertine ring sekala, majeng ring turunan miwah ring pakeraman. Ring niskala majeng ring Iyang.
 - na. Rajeg ngambelang saluwiraning pusaka wit tetinggalane. Tan wenang kaburayang, keadol wiadin kekantahang, yan tan manut wiguna miwah yan tan polih kerareman warga.
 - ca. Tan wenang melaksana paredara muwang angerabining wong arabi.
 - ra. Tan kepatut ngambil rabi, sadurung polih masadok ring sentana utawi kulawarga.
- (2) Yan sang balu mamurug kadi swadarmae ring ajeng, sampun sinanggeh (keanggeh) nilar swadarma / nilar sesana.
- (3) Balu kaucap tan pageh, sakadi ring sor :
 - ha. Drati krama utawi para dara.
 - na. Matilar saking pakubon tan masadok jantos 6 enem (sasih)
 - ca. Lempas ring swadharma saha tan prasida ngesehin solah maprawerti arep ring pituduh kulawarga.
- (4). Yan prade balu inucap tan pageh ring swadharma, kabawos tan patut, dados kakesahang saking pakubon sang sinanggeh purusa.

Palet 3

Indik Sentana

Pawos 56

Sewos ring sentana sane gumanti wantah medale saking turunan, wenten taler sane kasinanggeh Sentana, kadi ring sor :

- (1) Sentana wit sangkaning pekarsa (idih-idihan) paperasan, lanang wiyadin wadon, kewastanin sentana Purusa.
- (2) Sentana lanang wit hambil-hambilan pawiwahan, kewastanin sentana nyeburin. Kasinanggeh sentana Predana.
- (3) Sentana wit pametunnyaane bebinjat, lanang utawi wadon mangda segelisa keupakarain manut dresta.

Pawos 57

Ngadegang Sentana

Mungwing pemarga (pemargi) jagi ngadegang sentana kadi ring sor :

- (1) Sadurunge mangda sida nemu bebaosan sang ngedih ring sang sane kearsang (kaidih),muwah ring para warga sami, saha ilikita.
- (2) Puput pemargine kadi harep angka ha, kelanturang antuk Upasaksi ring iyang saha widi widana miwah ring Prajuru katekaning para krama.
- (3) Nganinin wit bebinjat lanang utawa wadon, sadurunge mangda kautsahang karerehang Wali Penyayut sang rare, tur lantur kaupakaranin mangda tan kasinanggeh cuntaka.
- (4) Mungwing pemuput sentana ring ajeng angka ca, karajegannyane manut pararem ring sajeroning warga, saha saksi miwah lekita sejangkepnyane. Sadurung Prajuru Desa / Banjar nyaksi wiyadin ngardinin lekita, mangda keloktahang, kesiarang riyin ring Banjar utawi Desa, mangda pamargine sinah, nemu ring kabuwatan.

Pawos 58

Swadarmaning Sentana

- (1) Patut satya, darma sadu, majeng ring sang sinanggeh Guru Rupaka.
- (2) Ngelanturang swadarman Guru Rupaka ring Sekala Niskala.
- (3) Tan alpaka, tur mangda sagilik saguluk selunglung sabayantaka ring para warga pasemetonan sami.
- (4) Satya rarem ring Adat miwah Dresta Agama sane prasida sampun kerajegang ring Desa.

Pawos 59

Sane kepatutang madeg sentana :

- (1) Patut keutamayang, kapertama ipun sane mawit saking turunan kepurusa.
- (2) Mawit saking turunan dadiya.
- (3) Yan tan polih kadi menggah ring ajeng (angka (1), (2)) kengin saking keturunan Predana tunggal Dharma.
- (4) Pamuput tan polih taler kadi menggah ring anjeng (angka (3)), mangda kautsahang saking tunggal Banjar / Tunggal Desa utawi dura Desa.
- (5) Ngadegang sentana tan pawates akeh kediknyane, pamekas mangda mejalaran kerareman ring sajeroning keturunan warga Pasemetonan.

Palet 4

Indik Warisan

Pawos 60

- (1) Warisan inggih punika wewarisan, tetamian artha brana, ayah-ayahan, ngupadi sukerta sekala niskala saking keluwaran, harep (majeng) ring keturunaniya.
- (2) Kang sinanggeh warisan :
Paderbean / pusaka tengah, minakadi sawah, tegal, miwah artha berana wit pusaka druwe leluhur, sane luwuran saking rama rena.
- (3) Artha brana miwah tegal sawah miwah sane sewosan wit paderbean, tinggalan saking rama rena (saking Guru Rupaka lanang wadon).
- (4) Wit jiwa dana, bebaktan Guru Rupaka lanang Wadon.
- (5) Utang piutang saking leluhur manut kawentenan.
- (6) kawitan Sanggar Pamerajan miwah Kahyangan.
- (7) Ayah-ayahan Pakeraman ring Desa / Banjar.

Pawos 61

Sang nerima warisan kepatut :

- (1) Sadurunge patut muputang Yadnyane ring leluwur, minakadi ngelaksanayang Pitra Yadnya sepuputniya.
- (2) Ngelaksanayang Dewa Yadnya ring Kawitan, Sanggah / Merajan.
- (3) Muputan sakeluwurin sosot leluwur.
- (4) Nawur utang-utang leluhur, miwah ngelanturang wewangunan leluwur.
- (5) Ring sampune puput pemargine ((1), (2), (3), (4)) kadi bawose ring ajeng, wawu kengin para sentanane ngayatang ngedum warisan.

Pawos 62

- (1) Sane kepatut nerima warisan :
 - ha. Prati sentana wit turunan purusa/sane medal saking pewaris.
 - na. Prati sentana rajeg, wit peperasan pewaris.
 - ca. Prati Sentana wadon/istri/daha tua wit turunan purusa.
- (2) Yen prade keputungan, utawi tan wenten preti sentana inucap ring ajeng angka 1 (a,na,ca) kepatutang :
 - ha. Sane patut nerima warisan pewaris, kula warganiya sang pewaris wit Dadiya Purusa (waris semeton temen)
 - na. Sang nerima warisan, mangda ngelaksanayang kadi kepatutan bawos ring ajeng (pawos 61 angka((1), (2), (3), (4), (5)))
 - ca. Yen prade tan wenten punika sami-sami, jagi kapidabdab antuk Banjar/Desa manut perarem.

Pawos 63

Pedum warisan kadi ring sor :

- (1) Manut Dresta Agama, waris purusa (lanang) polih apahan.
- (2) Waris Istri sane jenek ring pahumahan (nenten merabian) polih apahan utawi manut paiguman ring pahumahan
- (3) Lanang utawi Istri sane sampun ninggal umah (sampun pekidi utawi nganten) tur mewali malih budal, polih manut paiguman sameton ipun.
- (4) Karang ayahan Desa, sane kagenahin rawuh kelingkungan telajakannyane tan kengin kaepah kakuwasayang. Saantukan punika gumanti paderbean Desa.
- (5) Yen wenten mamurug jantos ngepah paderben Desa, miwah ngepah paderbean anak sewos, sane gumanti tan kekuwasa olih sang pewaris, kakenanin pamindanda manut pararem.

SASTHAS SARGAH

WICARA LAN PAMIDANDA

Palet 1

Indik Wicara

Pawos 64

- (1) Sang wenang mawosin minakadi mamutus sakeluwiring wicara ring Desa punika Prajuru Desa, minakadinnyane Kelihan Desa lan Mancagra, tur kesanggra antuk Prajuru sane sewosan.
- (2) Pamargi pamutus, nganutin pasuwara awig-awig, miwah mangda nganutin Tri Pramana saha Dresta Panglokika.
- (3) Yan tan prasida, kehatur ring sang Guru Wisesa / Sang Rumawos.

Pawos 65

- (1) Saluwiring wicara mangda segelisa kabawosang tur kapuputang. Bilih-bilih wicara sane mawiwit saking kecorahan, dusta miwah wirosa miwah sanungkas ring Awig-awig.
- (2) Sang pamuput mangda jejer ring tetiwak Darma Pamutus.

Palet 2

Indik Pamidanda

Pawos 66

- (1) Desa miwah Banjar wenang niwakang pamidanda ring Krama / Warga Desa / Banjar sane sisip.
- (2) Tatiwak danda inucap kelaksanayang olih Kelian desa Adat / Kelian Banjar, manut kawentenan.
- (3) Bacakan pamidanda luwire :
 - ha. Antuk ayahan maka penukun sisip.
 - na. Danda artha (mawit saking dadosan, pamidanda, urunan, seselangan miwah keteke-tekeng penikel-tikelniya).
 - ca. Rerampagan.
 - ra. Kecabut karang ayahaniya.
 - ka. Kesepekang
 - da. Penyanggaskara.
- (4) Pamidanda sane katiwakang patut madudonan, masor singgih manut kaiwangan.
- (5) Jinah pamindanda / raja berana olih-olihan pamindanda inucap kengin ngeranjing dados druwen Desa / Banjar.

Pawos 67

- (1) Krama sane langkung ring pasengketan, manut perarem desa/Banjar tan nawur pamindanda, urunan, utang seselangan wenang kerampagin.
- (2) Ngerampagin ngangge tata cara kadi ring sor :
 - ha. Rerampagan kemargiang antuk Prajuru Desa / Banjar, kesarengin antuk Prajuru sane sewosan, sekedik ipun mangda wenten tigang diri utawi manut kabuwatan.

- na. Hambil-hambilan pangerampage, mangda keanutan akeh kedik pamidandane, dadosane, miwah tetagihane tur mangda saha darsana.
- ca. Prajuru patut miteketang ring sang kerampagin, mangda barang rerampangan inucap mangdane segelisa katebas manut senger.
- ra. Sang sane ngemargiang pangerampag tan kengin ngambil barang sane kehinggilan (keutamayang manut agama).
- ka. Yen prade sang sane kerampagin tan nerima wiyadin manulakang indik pangererampagan punika inggih punika maka cihna sang sane kerampagin tan manut ring pamutus Awig-awig utawi perarem Desa miwah Banjar. Sang inucap kepatut :
 - 1). Kakeniyang danda, keraryanang mapekraman manut pararem.
 - 2). Kelanturang katur ring sang rumawos.
- da. Pamidanda sida buntas, minakadi pamindandane sane inucap ring ajeng risampunne :
 - 1). Pamidandane, kenan-kenane, paseselangane, miwah tatebasan barange sampun puput ketawur.
 - 2). Saha nunas pengampura ring Desa / Banjar, riyantukan nguwak pasubaya / perarem, minakadi Awig-awig.
 - 3). Nawur danda panguwak pasubaya, saha ngaturang perayascita penyapsap keiwangan ring Desa / Banjar.

SAPTAMAS SARGAH

NGUWAH – NGUWUHIN AWIG – AWIG

Pawos 68

- (1) Nguwah – nguwhin Awig – awig Desa puniki, kelaksanayang antuk Paruman Desa.
- (2) Awig – awig puniki kemargiang ngawit saking sesampune kehingkupin miwah keraremin.

Pawos 69

- (1) Saluwire sane wenten sadurunge, patut keanutang ring daging awig – awig puniki.
- (2) Saluwiring sane durung kebawos ring sajeroning Awig – awig puniki, patut kelaksanayang manut tata cara Dresta sane sampun memargi tur mangda kdasarini antuk Perarem.

ASTHAMAS SARGAH

P E M U P U T

Pawos 70

Awig-awig Banjar sajeroning Desa Adat Mengwi, patut nginutin tur nenten dados lempas ring Awig-awig Desa Adat Mengwi